

外交報彙編

第八冊

論摩洛哥交涉始末及列國會議情形

譯日本明治三十九年二月十九日東京日日新聞

今日海外有一最大問題者何。摩洛哥會議是也。近時摩事情狀。已疊接電報所傳。警察一事。又爲德法新啓之交涉。其他各事。猶在商榷。雖然。會議之結局。今尙不能預測。而爲世人之所憂。蓋德先提此事於列國會議之間。既獲公正之名譽。乃佯爲退讓。一似絕不干預者。而潛命其官吏說摩廷君臣。謂法之不足賴。而賴德乃爲萬全。更施其前此所行之手段。務使摩附己而後已。以此觀之。其後此憂患之來。實視戰爭之禍爲尤大也。

或謂德之於此。其用強迫之策以凌法。爲事所應爲者。曰。德既決意提出此問題。豈遽能退步耶。德之舊行政策。世固知之。蓋自普法戰後。畢士麥所定主旨。在壓抑法國。使卑屈蜷伏於文明列國之中。不能恢復其國家之威望。而當是時也。德乃常以己國兵力優強之勢。誇示世界。藉以威嚇法人。使不敢言越王殺父之讐。一千八百七十五年之事。顯然可見。及德皇威廉第二卽位。乃稍稍改變其政略。先罷畢士麥。

謀與法相親暱。使此策而果成。則德法聯合之後。其飛揚跋扈。必有不可測者。世界列國。或且凜然憚之。羣焉苦之。未可知也。當時法雖不應德之求。而德皇卒未阻其初念。及法外部德加士與各國締結種種條約。始悟對法政策之失。而鑄爲大錯。於是復用畢士麥之策。恨不能起黃泉而諮詢之。爾來每乘隙蹈瑕。務抑法以遂其志。夫豈無因。今之會議。卽以此素志爲其主義者也。故摩國能知之而陰拒之。則大幸也。摩苟昧昧焉附從於德。而盡力於會議。則德之政策。如虎添翼。愈得其勢而愈強。此議必不易於終結耳。

或又曰。世人以德國對摩政略之驟變。爲自奉天會戰。俄兵大敗而來。法國內閣議長羅褒。亦嘗主此說。此固當然。非同臆造。然其間猶有理由焉。日本之大勝。誠使德之經營遠東政略。至絕振興之望。而窒發達之機者也。其在南美。有美國孟祿主義。拒外來勢力之侵犯。而不許歐人插足其間。其在非洲。又已四分五裂。爲列強勢力所區限。惟其北境。略有可轉動之餘地。是必疏間有利害關繫於地中海沿岸之諸

國而使之乖離。乃得襲其空虛。乘間染指。此會議之所以起也。

今請以其向行之政策觀之。十九世紀之末以前。德於地中海問題。一若略不經意者。畢士麥在日。要惟於國際之間。偶一應用。平時絕不提及也。蓋德嘗使突尼斯陷於法。以搆法義之怨。德乃利用此怨。及羅馬一案。而驅義投入三國同盟。其後一千八百九十六年。義與阿比西尼亞爭戰時。法義交惡之度。已至於極。而英國於義舉兵英領瑞拉一事。意頗反對。義由是知英國之不可恃。又以德所倡三國同盟之範圍。無端侵入地中海沿岸。義國勢力圈之內。直斥之。而德殊不理。時義之執政。爲伐那斯塔侯。決欲與法相結。會有突尼斯一事。遂假之以結一千八百九十六年之約。而承認法之占領突尼斯。尋一千八百九十九年三月。英法以蘇丹及的黎波里叛地。而結發旭達條約也。義慮的黎波里後患之未艾。再與法訂一別約。自認法在摩洛哥有最優之權。而使法絕的黎波里之念。自是以至前歲。一千九百零四年英法之約。法西之約。又相繼而成。法以向者捐棄埃及之故。使英不干涉摩洛哥。以爲相當之

報德相褒洛亦以己國於摩利害淺鮮曾繼英聲明不干涉於摩法既信德之真意恃英西兩國之奧援乃欲經營北非以鞏固其利益當此時而北非問題殆將大定然至昨年春德皇有突遊天基亞之舉其名雖曰擁護摩國之獨立而實則欲重啓北非問題之議疏間有關係之列國而已則伺隙以乘之也蓋德既喪失其財力於膠州乃欲收之北非以爲桑榆之補耳

彼參預會議之列邦果將何若乎英之狀固極顯明而其他無直接關係於摩之國直陷於重圍不能擺脫按此會議實以協定德法爭執之點而起列國之中有與德同盟者有與法締約者袒德則法怨助法則德怒而列國任此勞怨之後直無可以取些須之償故識者有謂摩國一事當提出海牙萬國裁判所而判斷之者主此議者殊不乏人

此次會議凡參列一千八百八十年馬特里忒會議者皆與之其不加入者惟丹麥耳據倫敦泰晤士報所載曾歷舉各國之意向日

西班牙 欲維持西法兩國親厚之交誼。其意與英同。且英西兩國。於摩國及其他地中海問題。其利害無有違反者也。今西政府亦頗注意摩事。似欲擁護其在摩國之權利志望焉。

義大利 義所處之地位。可謂煩難矣。一則與法訂有的黎波里及摩洛哥之約。一則與德結同盟。然以精練外交之伐那斯塔侯。當委員首席之任。必能善爲斡旋。使各得其當也。

比利時 比國情狀。安特噴騰斯報中。有某政治家論之曰。比利時之利益。純然商業之利益也。法既聲言開放摩國門戶。則比必以爲誠實而不疑。向來法於中國及其他諸國。遇比國所經營之事。每贊成而援助之。此固比人所銘感不忘者云云。

美國 美之與摩。有利害關係者最久。凡此次會議所議決緊要事件。較之他國。有儘先最優之權。前與巴巴利諸國戰。剿蕩地中海海賊。率先與摩訂結條約者。卽爲美。而其他列國。所受摩國同等之待遇。亦自此條約而生者也。故當協定開放門戶。

勢力均衡等問題之際。美國有參預此議之權利義務。特境上警察一事。美國獨未爭先倡議云。時美國某報曰。此會議最大問題如國際警察徵收租稅二端。美國預議委員。非奉本國訓令。無投票之權利。故美之對此。僅於道義之間。力趣列國和衷議結。以保平和之局耳。

俄羅斯 據俄國報章所言。則謂俄政府曾訓告委員。使舉全力。以贊助法國所主張。首相維忒。於去月上旬。語人曰。俄國甚望摩國會議。不起紛爭。蓋德之政略。素主平和。是知迄會議之終。兩國必無所爭執。而卒能底定於樽俎之間也。

摩洛哥 摩國首席委員穆克黎。其手腕所至。有不可侮者。彼於會議。不爲倡議。而出提案。而但有參與會議之權利。昨年十二月下旬。曾以三事陳於議席曰。第一摩國委員。於本會議定之改革案件。無承諾之權。而惟摩洛哥國王。能決其可否。第二委員於議定案件。必其不害國王之權利領土者。乃入而奏陳之。第三參列此會之列國委員。不得爭先倡議。而固執已見云。

觀上所述。則德政府之真意何在。亦可灼然見之。毋俟贅言。法國人民。以爲德當英法訂約之際。必贊成之。而無反抗之意。其後英法突然訂約。德政府藉口於未接照會公文。謂爲不知此事。乃法國妄稱受有歐洲委託。而欲保護摩國。且其受有歐洲委託之言。謂出於摩王之口。於是德人盛言法有戰意。備極攻訐。法人亦多毀謗德加士所爲政策。以其對於德國。實未盡外交之能。至使德國終不明言其可否。而但待他國之機會。將大有所乘。是其失策。實在德加士無所用其掩飾。法國國際政局遭此艱危之故。卒以外交不能慎重將事。云云。其非難政府者。固不少也。今按德法兩國交涉情形。以詳述其會議之狀。如下。

此次會議。以一月十六日始。其所歸結。至爲簡易。昨年七月二十八日。德法兩國曾定會議大綱。其主要條款有四。

第一除阿爾述利亞境上以外。當以列國公同協意。以組織警察之事。

第二除阿爾述利亞境上以外。當續行禁止軍器進口之例。而由列國監察。

第三改革財政之事。又於摩國中央設立銀行。有頒行紙幣之權。

第四查察稅關及收入新款項之事。

法國自開會以前。即主張法之與摩。於地理上有特別之地位。此事會議時。列國固未許之。亦未拒之。然苟或許之。則會議之際。凡改革財政。組織軍隊警察。辦理禁止貨物等事。皆當委任法人。而此議終結問題。亦即在此。雖然。德國自其初即不能承諾也。

其辦理禁止軍器進口一事。大體固已決定。至警察問題。則忽有所爭執。而不能定議。據前電所傳。此事非僅一地方之警察問題。而其半實有關於陸軍。苟握其權者。即足以制摩國之死命。而其權力。不獨行於摩。即他國之軍隊。亦能抵抗之。而無所忌憚也。

近頃詳情。雖不能知。據近日美報。得一月二十四日阿爾述西拉斯電。則謂德國之意。主張列國各無特別之權。必權利平等以行事。而法則但承諾財政上之平等。若

政治上之平等。則拒絕之。致使會議景象。一若有不利於法者。美國雖爲中立。然其心目中。似不認法國有地理歷史上優越之權。故法國之交涉。備極窘苦云云。

初次開議之後。德曾提出一款。謂組織警察巡兵及總局之事。當以瑞士荷蘭比利時瑞典奧大利等外國人爲之。而法以爲是等諸國。皆從德國之指揮。則其實權。他日必有終歸德國之虞。而不許。德乃更易一說。謂組織警察隊。一任之摩王。而但由列國監督之。法則許警察隊之總局。任之於摩王。而必採選法人及西班牙人輔佐之。據近日各報曰。此實法國最後退讓之狀。已至於極。不能再讓云云。而德直拒之。不允。是卽現今之情形也。

德人於此。固早有憂其不能成議者。弗蘭克福特爾報。嘗評之曰。會議之事。若德國終於失敗。則法必得英西兩國之贊助。而復行前此之政略。美亦必應而援之。事至於斯。德自戰爭而外。實無善後之策。然德以對於摩事。有特別見解之故。戰爭之事。實不易言。至兩國爭執之要點。法於摩國一切改革之事。欲使列國悉委任於己。而

德則願付之國際公同管理之。此之爭端。或能互相退讓。以改革案中。之若干。分任於法。而其他皆任列國行之。雖未可知。然法苟不允許。德欲顧列國之意向。固不能強之。如是。德豈能自棄前說乎。抑強要法國之允從乎。不然。會議失敗之辱。必不能免也云云。

德相褒洛。曾於昨年五月。牒覆列國。其言曰。加盟列國。即一千八百八十年。參預馬特里忒會議者。雖聲

明承認法國對摩之策。或雖聲明。列國於此。無利害之干繫。而吾德之所主張。依然無所變易。若某國於摩。與其他最優國之待遇相背。而受特別讓與之權利。加盟列國中。但使有一國反對。則其所讓與者。即不能謂為合理之事。云云。由是觀之。則德固蔑視法國在摩之地位。而將欲進而代取之乎。今其事雖未終結。而此後所來電報。實有大可注目者矣。

按德皇之於摩事。固日唱平和之說。而以平和二字為口頭禪者。今觀此論。真耶偽耶。吾恐摩國會議。終不能行成於樽俎玉帛之間耳。

論德報誣英人之蠶食他國 節譯英國一千九百六年一月字內德報

當日俄兩使在美議和之時。德國最有勢力之哥羅痕報。嘗著一論。備言戰後大局。冀令歐洲列邦以暨德國。注意條款。毋使十九世紀德與列邦所得之在華權利。有所損失。其言雖如此。然今者各國播種遠東。而爲他人所收穫者。非德而誰。哥羅痕報謂各國不耗貲財。不傷生命。而擴其文明勢力於東方。得獲商務利益。此語殊未當也。

德自立國以至於今。固未嘗有助英之舉。而往者英國海軍。廣布各處。聲威既壯。禍患潛消。外人因得貿易於其地。而尤以德爲多。且德之船舶。通行世界。安然無恙。亦惟英國是賴。今乃仇視我英。翳何故耶。

歐洲大陸之輿論。皆謂我英存心叵測。有蠶食人國之謀。而德爲尤甚。至以竊盜相比擬。斯言也。我固無容置辯。然姑爲表述。則我之取坎拿大與印度。實以與法交釁所致。若夫瓜分波蘭之事。固普魯士皇斐力特列所主張。一千八百六十四年至一

千八百六十六年。普魯士侵奪人地者有二。一自丹奪取沙斯威何斯顛。一自奧奪取汗奴華。黑斯加爾。拿索。佛蘭福等地。一千八百七十一年。又自法奪取愛薩斯鹿林二省。是諸地者。皆非以法理得之。蓋蓄志已久。而竟遂其私耳。我英紅十字會。所在有之。其船舶屯駐之區。如波斯灣。如地中海。如西非洲之內河。如太平洋之各島。國旗所至。託於其下者。生命財產。卽得保全。且能使商務得以自由。而無稍滋擾焉。我英在五洲勦滅海盜之事。自十三世紀以來。史不絕書。約舉大略。則十三世紀之於波羅的海及歐洲各地。十七世紀之於美洲西印度哲美加各島。又若印度洋南非海面及馬達加斯加各地。十八世紀之於西班牙海印度洋北美福祿利達。維支那等地。十九世紀之於中國南方香港澳門及南洋麻六甲各處。此皆渠魁大盜。而我喪無數之生命財產。僅以平之。迨十九世紀之末。新舊兩世界。東西兩半球。始得目覩太平。共享路不拾遺之福焉。此我英殲滅海盜之歷史也。

至德謂我英謀略土地。謬妄尤甚。今亦略述一二。以表我英之坦然爲心焉。今北非

天基亞一地。設當時爲英久據。則今日北非歷史。必大可觀。乃得之二十年。旋又棄之。至文諾加一島。屬於英者。歷七十年。卒以樞垣無人。治理未當。一千七百五十六年。法又據之。一千七百九十八年。英欲舉兵往攻。旋降於英。一千八百零二年。既訂亞米和約。毛爾塔島爲英所有。而以文諾加島。交還西班牙。一千八百六十三年。我英又將義阿尼羣島。讓歸自主。以遂島民聯合希臘之願。至占據古巴。乃由戰勝而得。然未幾亦交還西班牙。菲律賓羣島。又爲英得自西班牙者。一千七百六十三年。和約成。英亦還之。當維也納大會時。英使嘉斯達釐伯爵。又將東方要地之爪哇及西里比羣島。交還荷蘭。據此以觀。則知德人所謂蠶食土地者。實誣我耳。德於歐洲之外。得有屬地。非得我英之優待。何以致此。如嘉麥倫多哥蘭二地。我英欲使江海流域。闢地通商。特許德人占領。至於東非境土。乃我英立溫斯頓夙所經營者。後以贊助德國闢藩政策。故許以其地歸德。太平洋各島之爲德所據者。亦我英讓之。若夫中國之開闢口岸。設立海關。締結利益均霑條約。非我英發難。安有所成。其海關

員吏本約以歐人共任。乃總稅務司赫德多用德人。然德人之意。直欲使赫德去任。盡以德人當其衝而後已。是豈非以怨報德之爲耶。

一千八百七十六年。我副領事馬嘉理。當考察緬甸至滇大路時。爲華人所戕。然我政府卒無他求。不過略索賠款及多闢商埠。爲各國經商公共之利耳。一千八百九十八年。德人占領膠州。將囊括山東全省爲己有。不顧他國之利益。推求其故。實僅教士被害。乘機以行暴耳。若謂英有香港。法有安南。德亦當有膠州。此說尤謬。英之於香港也。實與中國爭戰二年。而後得之。變荒僻而爲繁盛。皆我英經營之力。其事與法之得安南。俄之得中亞。及我英往者之得印度。情勢相同。非若德人行事之有悖公理也。

至我之占領威海。實慮爲德所併耳。今德猶欲謀占長江至黃海一帶之地。豈夢中幻想。尙猶未鑒所求耶。

予著是說。非與德辯也。第欲使世人知德人所言之不根。而二百年來。我英所爲之

事則大抵爲維持文明各國之利益而起。他國處此亦豈能如我耶。

按自德據膠州。俄英效之。旅順威海相隨以去。而我國北方之鎖鑰盡失。論者謂德人包藏禍心。故不憚首發難端。各國爲均勢計。乃有效尤之舉。洵公言也。比聞德使議撤京津駐兵。爲各國倡。其誠其僞。吾不敢知。然外交之術。變幻百出。安知其不以此市恩於我。而更謀伸臂於長江耶。

論外交近局

譯英國一千九百六年一月二十六日威斯頓報

英國更革政府之時。適日本內閣告退之日。世人罕有注意於此者。按日本內閣。雖更置一新。而政略則未嘗或異。昨得東京來電。詳述其國新相西園寺公望之演說。略謂國民有合羣之責。惟凡百措施。仍宜率由舊章。卽前相之對外政策。亦必無改云云。至我英新內閣之對外政策。日人知之甚諗。無所誤會。外部葛雷曾謂我英對外政策。決無變更。前相巴爾福所與各國訂立條約。自必規隨而行。日人今擬大興製造。當亦爲英人所深許。而自此以後。日本商務。必可蒸蒸日上。韓既爲其所有。而

責令中國開放亦意中事也。至開放中國之舉。我英亦必贊成。蓋中國領土之得以保全。實惟英日是賴。而我英之力保和平。則又我皇愛華德第七之所主張也。且英德邦交亦甚輯睦。英人必不從中煽惑。以啓嫌隙。而張伯倫理財新策。終以失敗。英人莫不稱快。即令有成。亦不使英人存心仇德。夫我英商貨之銷流他國者。固甚夥。而以德爲最。今者南非事件。已爲他人排斥。凡留心時事者。咸謂新政府必能使我英與各國日益輯睦也。

近者巴黎有書刊布。於日俄戰後各國之外交。言之甚悉。其大意謂日俄之戰。德所主使。俄人諱敗不言。亦德人之意也。德政府煽俄攻日之說。雖吾儕疑信參半。而著者則證據確鑿。其全書緊要關鍵。尤在訂約修好。以爲他日聯盟之地。此與本報夙所主持者固無異也。若英法俄若英日。固皆訂立約章。載在盟府。則他日之英美英德。聞風繼起。固吾輩所深望。誠以開放非洲土地與夫中國之北部。實爲英德二國之所當合力經營者也。且或謂英俄二國亦當有聯盟之舉。然俄國內亂未靖。他國